

Ashdown informirao organe BiH o stavovima Evropske unije o EUFOR-u

Visoki predstavnik i specijalni predstavnik Evropske unije u BiH, Paddy Ashdown, jučer je proslijedio Predsjedništvu BiH [izvještaj](#) koji je 23. februara visoki predstavnik EU Javier Solana prezentirao ministrima vanjskih poslova zemalja članica EU o mogućem vojnom angažmanu EU u Bosni i Hercegovini.

Izvještaj se zasniva na pretpostavci da bi, ukoliko NATO odluči da okonča misiju SFOR-a u BiH, EU trebala biti spremna na vojni angažman svojih snaga u Bosni i Hercegovini. U izvještaju se ističe da bi, pri osiguravanju vojnih snaga za BiH, glavni princip Evropske unije bio da podrži težnje ove zemlje ka punoj integraciji u EU i NATO.

U izvještaju se kaže da bi ovaj angažman trebao biti sastavni dio sveobuhvatnog pristupa u kome bi se objedinile političke, ekonomske i sigurnosne dimenzije angažmana Evropske unije u BiH. Izvještaju takođe preporučuje jačanje koordinirajuće uloge specijalnog predstavnika EU, kao prvog među jednakima kad su u pitanju vodeći ljudi različitih misija Evropske unije u BiH.

U izvještaju se potvrđuje da bi snage EU imale novu i drugačiju misiju u poređenju sa misijom SFOR-a. SFOR će, po odlasku iz BiH, ostaviti iza sebe situaciju veoma različitu od one u kojoj je ova zemlja bila u vrijeme prvog angažmana NATO-a 1995. godine. Snage EU bi imale dva osnovna cilja. Prvo, one bi bile garancija sigurnog okruženja potrebnog da bi se ispunili ključni ciljevi Plana provedbe misije OHR-a i procesa stabilizacije i pridruživanja Evropskoj uniji, i dale sopstveni doprinos njihovom ispunjenju. Drugo, snage bi bile posebno usredsređene na zajedničku borbu protiv organiziranog

kriminala. Snage EU bi dakle trebale preuzeti vojne nadležnosti navedene u Daytonskom mirovnim sporazumu, te bi bile krajnji garant ovlasti visokog predstavnika utvrđenih Daytonskim sporazumom. Trebale bi posjedovati kredibilitet i snagu, te djelovati u skladu sa Poglavljem VII Povelje Ujedinjenih nacija. Imajući u vidu da je međunarodna zajednica u BiH bila najdjelotvornija u situacijama kada je radila zajedno, sa NATO-m bi se održavala veoma bliska suradnja.

Konačno, u izvještaju se preporučuje da se intenzivni razgovori između EU i BiH o mogućem vojnom angažmanu Evropske unije nastave.

“Ovaj izvještaj naglašava dugoročnu predanost EU kada je u pitanju BiH i njena integracija u euroatlanske strukture,” rekao je visoki predstavnik i specijalni predstavnik Evropske unije. Dodao je da je “mjesto BiH unutar evropske porodice zemalja, a bez ove regije Evropa ne bi bila potpuna.”